



Tužilaštvo - Tužiteljstvo Bosne i Hercegovine
Тужилаштво Босне и Херцеговине

Broj: T20 0 KTA 0027224 25

Sarajevo, 15.08.2025. godine

Na osnovu člana 35. stav 2. tačka e) i člana 216. stav 3. ZKP-u BiH donosim sljedeću:

NAREDBU
o nesprovođenju istrage

Neće se provoditi istraga na osnovu e-mail podneska dostavljenog na službeni e-mail Tužilaštva BiH sa e-mail adrese ... kojim podnosilac prijavljuje osobu koja na društvenoj mreži „Instagram“ koristi korisničko ime „(...)“ zbog krivičnog djela Izazivanje nacionalne, rasane ili vjerske mržnje, razdora i netrpeljivosti iz člana 145a. KZ BiH jer je iz predmetnog e-mail podneska i pratećih spisa očigledno da prijavljeno djelo nije krivično djelo.

Obrazloženje

Tužilaštvo BiH zaprimilo je dana 14.07.2025. godine putem službene e-mail adrese institucije e-mail podnesak sa adrese ..., kojim podnosilac prijavljuje osobu koja na društvenoj mreži „Instagram“ koristi korisničko ime „(...)“ zbog postavljanja objave na toj društvenoj mreži, koja prema mišljenju podnosioca sadrži elemente govora mržnje i potencijalnog opravdavanja ratnih zločina u smislu člana 145a. KZ BiH, sa priloženim Screen-Shot ispisom sporne objave.

U istom podnesku podnosilac naglašava dio objave koji glasi „U objavi spominje „da bi radije pričala djeci kako su ih tukli na buljoke“ nego „da moraju šapatom da pričaju priče o žici, jamama i logorima“.

Članom 145a. Stav 1. KZBiH propisano je da krivično djelo Izazivanje nacionalne, rasne ili vjerske mržnje, razdora i netrpeljivosti čini onaj ko javno izaziva ili raspiruje nacionalnu, rasnu ili vjersku mržnju, razdor ili netrpeljivost među konstitutivnim narodima i ostalima, kao i drugima koji žive ili borave u Bosni i Hercegovini, te onaj ko javno podstrekne na nasilje ili mržnju usmjerenu protiv grupe osoba ili člana grupe određene s obzirom na rasu, boju kože, vjeroispovijest, porijeklo ili nacionalnu ili etničku pripadnost itd.

Pri tome sadržaj objave na koju se odnosi prijava podnosioca nema konkretan kontekst u smislu opredjeljenja kome je tačno i kada objava upućena, odnosno da je ista upućena određenoj zaštićenoj skupini s obzirom na rasu, boju kože, vjeroispovijest, porijeklo ili nacionalnu ili etničku pripadnost, kako je to propisano citiranim članom 145a. stav 1. KZ BiH. Radi se o izjavi koja je apstraktna, uopštena sa metaforičkim značenjem bez jasno definisanih pokazatelja na koga i sa kojom namjerom je ista usmjerena i sa mogućnošću različitog interpretiranja iste.

Dakle, kako je sporna izjava neprecizna jer ne daje mogućnost tačnog i nesumnjivog identifikovanja skupine na koju odnosi, pri čemu se iz iste ne može zaključiti da direktno poziva na nasilje po bilo kojem zakonom zaštićenom osnovu u smislu govora mržnje, to je donesena je Odluka kao u Dispozitivu ove Naredbe.

O nesprovođenju istrage, kao i o razlozima za donošenje Naredbe o nesprovođenju istrage, Tužilaštvo BiH će, shodno članu 216. stav 4. Zakona o krivičnom postupku BiH, obavijestiti podnosioca prijave, koji ima pravo podnošenja pritužbe Kabinetu glavnog tužioca u roku od osam (8) dana.

**TUŽILAC
TUŽILAŠTVA BiH**